

Baez gwn sae'gva, gou couh siengj hwnj gienh saeh fatseng youq it nienzgaep ndeu.

Miz baez ndeu cuengqhag dauq-ma, gou caeuq Lij Lingz、Yij Vei itheij sij cozyez. Gwj sij gwj sij, Lij Lingz cam:“Sou siengj gwn sae'gva lwi?” Yij Vei lienzmuengz naeuz: “Siengj, lienz loq fangzhwnz hix siengj gwn bw! Hoeng, neix baenzlawz miz ya!” Lij Lingz saeqsing naeuz: “Ndaw suen ranz mehbaj gou ndaem miz, raeuz itheij bae aeu gwn.” Gou lienzmuengz naeuz: “Guhcaeg deng rox mbouj ndei ba?” Lij Lingz naeuz: “Raeuz byawz hix mbouj lwnh okbae, duzfangz hix mbouj rox ha.” Gou naeuz: “Dwg ha! Hoeng, danghnaeuz deng mehbaj mwngz fatyienh, mbouj deng moeb cij gvaig ne!” Lij Lingz naeuz: “Mbouj lau, mehbaj daengx ranz vunz cungj bae gyaed ndaem naz lo.”

Caen dahraix, ranz mehbaj Lij Lingz gven dou caemrwgrwg. Yiengh-neix, dou benz gvaq ciengzdaemq, diuq daengz ndaw suen. Vasai, cungj dwg sae'gva hung, cingq ninz youq gwnz namh caengz ndiu ne! Dou genj aen hung mbaet. Dou umj sam aen sae'gva, lienz ruenz daiq ringx, gig mbouj yungzheih benz ok ciengz-daemq, buet coh laengmbanj. Dou sim diuqboebboeb dwk bag hai sae'gva,

Anq “Sae'gva”

西瓜案

贵港市覃塘区蒙公乡高占小学六年级 庾格基


yienznaeuz sae'gva youh hoengz youh sa, hoeng gou cix gwn mbouj ndaej ok feihdauh daeuj.

Ngoenz daihngaih cuengqhag dauqma, gou yawjraen gwnz daiz miz haujlai limq sae'gva, noh gva youh hoengz youh sa, gou gipmuengz cam: “Gij sae'gva neix daj gizlawz aeu daeuj?” Daxmeh naeuz: “Dwg cawx dauqma, mwngz mbouj dwg gig gyaed gwn ma, dwg cawx hawj mwngz, gwn ba!” Gou dingq le, vax limq hung ndeu couh gwn hwnjdaej. Daxmeh cam: “Van lwi?” Gou naeuz: “Neix youh mbouj dwg caeg daeuj, baenzlawz mbouj van ne?” Daxmeh naeuz: “Neix couh deng lo, lwgnyez wnggai bae caeg doxgaiq bouxwnq ma? Daj iq couh caeg doxgaiq, daengz hung mbouj baenz vunzvaih ma?” Gou dingq le, roxnyinh aen “anq” deng daxmeh buq lo. Aeya, gou caen huk, baenzlawz

dawz saehsaed gangj okdaeuj ne?

Gou caen boiqfug daxmeh buq anq leixhaih! Gou laihnaeuz daxmeh itdingh fwd gou donq ndeu, hoeng daxmeh cij dwg unqswnh doiq gou naeuz: “Sae'gva dwg bouxwnq sinsin hojhoj ndaem, cijaeu mwngz swgheij gaenx guhhong, hix ndaej sou lwgmak.” Gou dingq gij vah daxmeh, couh lumj byawz fak goenq dujrwz ndeu ityiengh, dujrwz goenjhuu, raemxda doekbyoegbyoeg.

Daxmeh heuh gou bae nyinh loek, gou umj aen sae'gva hung ndeu siengqyaek siengqyawj dwk byaij daengz ranz mehbaj Lij Lingz, dinglingz mehbaj Lij Lingz byaij okdaeuj, de raen gou yienghneix, sien dwg ngwngx yaep ndeu, ciepdwk riuhaa hwnjdaej. Gou najmong naeuz: “Mehbaj, ngoenzlwenz gou caeuq Lij Lingz, lij miz Yij Vei sam



boux moix boux caeg aen sae'gva hung duhmwnz, gou loek lo. Daxmeh cawx aen sae'gva ma, gou dawz daeuj boiz hawj mwngz.” Mehbaj Lij Lingz yiengq rog doidoi aen sae'gva, naeuz: “Lwgnyez ma, rox loek couh ndei, aen sae'gva neix mwngz couh umj bae ma gwn ba, gou ndaw suen lij miz ne!” Gou naeuz: “Neix baenzlawz ndaej, daxmeh itdingh ndaq gou.” Gangj sat, gou cuengq aen sae'gva couh buet. Hoeng, baez neix buet, ndaw sim gou di he hix mbouj vueng.

Gienh saeh neix gvaqlaeng, gou caiq hix mbouj caeg doxgaiq bouxwnq gvaq lo, aenvih gienh saeh neix itcig son gou majhung.

(指导老师:覃珍团)

Bonj Saw Daengzcog

未来的书

贵港市覃塘区蒙公乡古山小学 韦玉梅

Haemhlwenz, gou loq fangzhwnz, loq raen swgheij bienqbaenz boux gohyozgyah ndeu, fatmingz le cungj saw gig saenzgeiz ndeu.

Cungj saw neix caeuq gij saw bingzciengz ca mbouj geijlai, cij dwg gwnz ndang lai le geij aen haigven. Ndawde sou miz gak cungj saw, neiyungz fungfouq. Cijaeu mwngz dwkhai aen haigven saekloeg, mwngz couh ndaej cazyawj gij neiyungz mwngz siengj aeu yawj haenx, danghnaeuz mwngz yawj seizgan daiq nanz, de vanzlij rox daezsingj mwngz guh lwgda baujgencauh ne! Aenvih doiq da couh dwg aen cueng raeuz, raeuz wngdang ndeindei baujhoh de.

Danghnaeuz mwngz dwg youq banhaemh yawj saw, mwngz couh dwkhai aen haigven saekhoengz, bonj saw couh sikhaek rongh hwnjdaej, yienghneix raeuz yawj saw couh fuengbienh lai lo. Danghnaeuz mwngz dwg dwkhai aen haigven saeklamz, bonj saw neix vanzlij rox dawz gij cih ndaw saw doeg hawj mwngz nyi. Yienghneix, boux damengz hix ndaej doegsaw lo, geijlai ndei ya!

.....

“Siujmeiz, vaiq hwnqdaeuj lo.” Daxmeh youq henz rwz gou hemq naeuz. Gij loq fangzhwnz gou deng heuh singj lo.....

(指导老师:李专红)

Gienh Saeh Nanzlumz Ndeu

难忘的一件事

贵港市覃塘区蒙公乡古山小学 韦翠芳

Youq ndaw swngghoz raeuz fatseng haujlai saeh, lumjnaeuz, gvaq ciet “roek it”, caeuq daxboh daxmeh bae lijyouz, hoeng gienh saeh hawj gou ceiq nanzlumz dwg baez gaujsi ndeu.

Bi' gvaq, ngeih nienzgaep geizgyang gaujsi seiz, gaujsi seizgan miz 90 faen cung. Hainduj gaujsi lo, gou gig nyinhcaen yawj daez, naemjngeix, dap daez, seizgan ngamq gvaq ndaej diemj cung ndeu, gou couh sij sat lo. Hoeng



gou mbouj lumj bouxwnq yienghhaenx sikhaek dawz gaujgenj gyau hwnjbae, cixdwg sijsaeq genjcaz. Gou ngeix gou itdingh dwg gauj ndaej 100 faen lo, gvaq geij ngoenz, lauxsae dawz gaujgenj fat roengzdaeuj seiz, gou caen dwg gauj ndaej 100 faen. Cuengqhag le, gou angqvau dwk dawz gaujgenj baema hawj bohmeah yawj, daxmeh naeuz: “Dahlwg gou baezneix gauj ndaej caen ndei ha, baezlaeng caiq nyinhcaen gauj, itdingh hix gauj ndaej ndei.” “Dahlwg gou caen ak ha!” Daxboh hix riunyumj dwk rub aen gyaed gou gangj. “Gou itdingh roengzrengz.” Gou gangj, “gou aeu hag gij cihsiz moq engq lai, engq ndei.”

Banhaemh, gou loq fangzhwnz, gou yawjraen gou youh gauj ndaej 100 faen lo. Gienh saeh neix caen hawj gou nanzlumz.

(指导老师:李专红)



Biujgo Iq Gou

我的小表哥

贵港市覃塘区蒙公乡高占小学二(2)班 韦飞扬

Gou miz doiq biujgo songseng ndeu, gyoengqde cij beij gou hung haj ndwen. Biujgo hung heuh guh Veiz Gaihda, biujgo iq heuh guh Veiz Gaihgi. Seizneix gou yaek lwnh hawj daihgya dwg biujgo iq gou, de caen dwg boux “sawmaez iq” ha.

Miz baez ndeu, goengnax hung

daiq song boux biujgo youq ndaw gyanghonz youzlangh. Gwj byaij gwj byaij, goengnax hung nyex gyaed baez yawj, fatyienh biujgo iq mbouj raen lo. Neix hwk dwk goengnax hung lau liux, lienzmuengz caeuq biujgo hung bae ra, youq ndaw gyanghonz ra geij hop lienz ngaueuz cungj mbouj raen.

Sawqmwh, goengnax hung lumjbaenz siengj hwnj gijmaz, de lumj mbin ityiengh buet baema ranz, hai dou baez yawj, soeng gaemz heiq ndeu, ndei lai lo, “lwgfanz iq” cingq naengh youq henz daizsaw maezmwdmwd dwk yawj saw ne!

Biujgo iq ceiq gyaed yawj bonjsaw gangj gij daswyenz haenx, rox gij cihsiz caen mbouj noix. Geiq ndaej miz baez ndeu, gou caeuq biujgo hung lwnzlawh ok daez daeuj duenz de, hix nanz mbouj ndaej de. Doengzhag ban de cungj haenh de guh “bouxbozsw iq swyenz”.

Bonjsaw ndaej hawj raeuz haujlai cihsiz, gou baezlaeng hix aeu lailai yawj saw.

(指导老师:韦彩芳)